

疆 邦 藝 圃



樵庵樂府目錄

水調歌頭

念奴嬌

喜遷鶯

南鄉子

菩薩蠻

朝中措

臨江仙

西江月

樵庵樂府

容城 劉 因 靜修

水調歌頭

同諸公會飲王氏飲山亭索賦長短句仿晦

翁體

一諾與金重一笑對河清風花不遇真賞終古未全平
前日青春歸去今日尊前笑語春意滿西城花鳥喜相
對賓主眼俱明平生事千古意兩忘情我醉眠卿且
去扶我有門生窗下煙江白鳥窗外浮雲蒼狗未肯便
寒盟從此洛陽社休厭小車行

念奴嬌憶仲良

中原形勢東南壯夢裏譙城秋色萬水千山收拾就一

片空梁落月煙雨松楸風塵淚眼滴盡青青血平生不
信人間更有離別舊約把臂燕南乘槎天上曾對河
山說前日後期今日近悵望轉添愁絕雙闕紅雲三江
白浪應負肝腸鐵舊游新恨一生都付長鋏

喜遷鶯

乙亥元日

春風滿面是胸中春意與春相見不醉醺然無人也笑
況是一年清宴寧兒挽鬚學語爨婦舉杯重勸道惟願
願貧常圓聚老常康健□□□□□□二十七年世事
經千變今是昨非春思花柳消盡冰霜殘怨門外曉寒
猶淺門上垂簾休捲燈花軟酒香濃趁歌聲試輕輕嚙
南鄉子題外甥郭氏留耕堂壁上

方寸足留耕大勝良田萬頃平陰理不隨陵谷變分明
霜落西山滿意青千載董生行雞犬昇平畫不成終
日相看天與我高情身外浮雲自古輕

二張彥通壽

窗下絡車聲窗外兒童課六經自種牆東新菜蕪青青
隨分杯盤老幼情千古董生行雞犬昇平畫不成應
笑東家劉老子無能縱飲狂歌不治生

菩薩蠻王利夫壽

吾鄉先友今誰健西鄰王老時相見每見說先公音容
在眼中今朝故人子爲壽無多事惟願歲長豐年年
社酒同

朝中措賀廉侯舉兒子

金張家世費貂蟬七葉侍中冠若就詩家攀例生兒合
喚添官 憑誰寄語廉泉父老斗酒相歡今歲孫枝新
長甘棠消息平安

臨江仙賀廉侯舉次兒子

四海荊州吾所愛虎賁誰似中郎子孫今擬喚甘棠添
官前有例簪笏看堆牀 明日乃翁歸舊隱故園喬木
蒼蒼青衫竹馬雁成行當年廉孟子應有讀書堂

二送王從事

行色恩恩緣底事山陽梅信相催梅花香底有新醅南
州今樂土得意卽銜杯 君見太行憑寄語雲閒蒼壁


崔嵬平生遮眼厭黃埃高樓吾有興無惜送青來

西江月送張大經

留在平生落落休嗟世事滔滔青雲底柱本來高立向
顏波更好一片花飛春減可堪萬點紅飄江花江月
可憐宵莫賦招魂便了

二贈趙提學酒

買得雞泉新釀病中無客同斟遣人持送旅窩深呼取
毛翁共飲少箇散花天女維摩憔悴難禁安排走馬
杏花陰咫尺春風似錦




雲峰詩餘目錄

大酺

滿江紅

水調歌頭



雲峰詩餘

婺源 胡炳文 仲虎

大酺和玉壺餞春

我欲牋天天無語渺渺誰司喉舌回看山色好有清池
似玉一觴堪潔卻笑幾載京華嬌花媚柳攪動風情如
熱何如榮阿裏自川原畫錦石缸晴雪更醉裏賡酬花
邊吟嘯妙詞稱絕友鶯聲切切歌伐木怎賦騷中鳩
最好是靜中佳興眼底繁英四時春在那曾別笑殺渠
凝曉鐘未動眼無交睫賞心處長娛悅花開有謝休問
先天康節畫梁燕應解說

滿江紅贈吳又玄


吳又玄得其伯父子雲太博易學游戲玄拆字閒論
人窮達貴賤累多奇中作此贈之

一畫先天誰知得已涵玄九這易玄機括子雲傳授杜
宇一聲春欲曉牡丹幾朵花開畫問堯夫數字自何來
俱參透 心宵裏羅星宿心畫上占爻繇看肆中簾捲
門前車轅易字分明書日月口天真是談天口豈太玄
而後遂無玄如今又

水調歌頭爲揚志行壽

絳闕春回近先放玉堂梅當時產此人傑天豈偶然哉
吾道以爲元氣學者仰如北斗聊復振儒臺來歲紫微
閣闔闔看天開 七旬老千里路爲公來二十年前繡

衣曾奉紫霞杯
今對湖光山翠喜
有碧桃玉藕壽酒得
重陪明日賦歸去
回首望蓬萊



定字詞目錄

玉樓春二

金菊對芙蓉

水調歌頭二

西江月

臨江仙

滿江紅

滿庭芳二


滿江紅

浣溪沙

清平樂二

沁園春

水調歌頭



定字詩餘

休寧 陳 櫟 定字

玉樓春

代和金滄洲韻

新篁搖翠添波綠，妝點璫溪深。一曲青衫司馬緩來遊，
卜夜清歡孤繼燭。江心桃杖聊開束，更好著鞭馳駿足。
樽前聊有遏雲聲，劣可纖纖扶藥玉。

又

庭槐鬱鬱雲屯綠，新霽彩移階砌曲。麗詞入手可絃歌，
想是咄嗟成刻燭。牙籤高閣應難束，黃嬭有時誇睡足。
覺來課讀愛諸孫，他日登金仍步玉。

金菊對芙蓉

九月二十五日壽金桐岡